

AMALAN DAN KELEBIHAN BULAN MUHARAM

Bulan Muharram merupakan antara bulan yang begitu istimewa serta memiliki kelebihan yang tersendiri. Ia juga dikenali sebagai salah satu daripada empat bulan haram sebagaimana yang disebutkan dalam nas. Firman Allah SWT dalam surah al Taubah ayat 36:

إِنَّ عِدَّةَ الشُّهُورِ عِنْدَ اللَّهِ أَثْنَا عَشَرَ شَهْرًا فِي كِتَابِ اللَّهِ يَوْمَ خَلَقَ السَّمَاوَاتِ وَالْأَرْضَ مِنْهَا أَرْبَعَةٌ حُرُمٌ ذَلِكَ الْيَمِينُ فَلَا تَظْلِمُوا فِيهِنَّ أَنفُسَكُمْ وَقَاتِلُوا الْمُشْرِكِينَ كَافَةً كَمَا يُقَاتِلُونَكُمْ كَافَةً وَاعْلَمُوا أَنَّ اللَّهَ مَعَ الْمُتَّقِينَ

Maksudnya:

Sesungguhnya bilangan bulan-bulan di sisi (hukum) Allah ialah dua belas bulan, (yang telah ditetapkan) dalam Kitab Allah semasa Ia menciptakan langit dan bumi, di antaranya empat bulan yang dihormati. Ketetapan yang demikian itu ialah agama yang betul lurus, maka janganlah kamu menganiaya diri kamu dalam bulan-bulan yang dihormati itu (dengan melanggar laranganNya); dan perangilah kaum kafir musyrik seluruhnya sebagaimana mereka memerangi kamu seluruhnya; dan ketahuilah sesungguhnya Allah beserta orang-orang yang bertaqwa.

Antara amalan sunat yang dilakukan oleh Rasulullah SAW dalam bulan Muharam adalah berpuasa pada 10 Muharram. Hadis daripada Ibn Abbas RA, Rasulullah SAW bersabda:

أَنَّ رَسُولَ اللَّهِ صَامَ يَوْمَ عَاشُورَاءِ، وَأَمَرَ بِصِيَامِهِ

Maksudnya: Rasulullah SAW berpuasa pada hari Asyura' dan Baginda menyuruh puasa pada hari tersebut.

(Hadis Riwayat Bukhari dan Muslim)

Barang siapa yang melaksanakan puasa sunat pada hari tersebut, maka akan diampunkan oleh Allah SWT akan dosa-dosanya setahun yang lalu. Ini merupakan ganjaran hebat yang dikurniakan oleh Allah SWT kepada sesiapa yang mengambil peluang melaksanakan alaman ini. Maka, janganlah dilepaskan kesempatan ini begitu sahaja. Hadis daripada Abu Qatadah RA, Rasulullah SAW bersabda

يُكَفِّرُ السَّنَةُ الْمَاضِيَّةُ

Maksudnya: Ia menghapuskan dosa-dosa setahun yang lalu.

(Hadis Riwayat Muslim)

Perlu diingat, pada hari tersebut, orang-orang yahudi berpuasa kerana melaksanakan pegangan mereka. Akan tetapi Nabi SAW memerintahkan umat Islam agar melaksanakan puasa pada hari yang ke 9 Muharram demi untuk membezakan puasa mereka dan puasa orang Islam. Hadis daripada Ibn Abbas RA, sabda Rasulullah SAW:

لَئِنْ بَقِيتُ إِلَى قَابِلٍ لِأَصُومَنَّ التَّاسِعَ

Maksudnya: Jika aku masih hidup pada tahun hadapan, aku akan berpuasa pada hari yang kesembilan Muharram.

(Hadis Riwayat Muslim)

Disediakan oleh:

Bahagian Maktabah

Jabatan Mufti Negeri Perak

1 Muharam 1444H / 30 Julai 2022